

auch von einem solchen Gemewr angezeigt worden/vnd solche verzeichnung in Ecken mit  $\perp$  bezeichnet seind/dieweil aber solche Gemewr im ersten Buch gnugsam erkleret/ist nit von nöten dises ors sich weiter zu erstrecken. Dieweil auch furtan dises Capitels Text beim Vitruuio ganz verstendlichen von vns verteutschet/wöllen wir dises lest Capitel sampt dem sechsten Buch enden vnd beschliessen/doch zu besserem verstand solcher fundament vnd grundfestung haben wir dir obgesetzte Figur für augen gestellt.

Ende des Sechsten Buchs Vitruuij.

Vorrede Vitruuij an den Großmechtigsten Keyser Augustum / in das vij. Buch der Architectur.



S haben die alten vnserer Vorältern gar fürsichtiglichen gehandelt / das sie erstlichen außbracht durch Schrifften/was jeder in seinen gedancken gefasset/vnnd new erfunden / dasselbig den nachkommenden zu nutz vnd vorthail nach zulassen. Darmit solche scharpffsinnige erfindung nicht vergeblich wer/vnd mitler zeit verlorren oder vndertruckt werden möcht/sonder durch vilfeltige vermerung der Bücher / also je von ein zum andren zu ewigen zeiten erhalten würde / so lang ein jede Kunst auffss aller höchst vnd der scharpffen subtiligkeit kommen mocht. Derhalben jnen nicht wenig sonder auff das aller höchst zu dancken/in sonderheit das sie auß keinem neidt oder vergunst solches vertruckt/sonder also recht freywillig vnnd Vetterlich mit getheilt haben/vnnd alles was dem Menschen auff scharpfsinnigkeit fürkommen vnnd Menschliche vernunft wissen vnnd erfahren mag vnderstehen Schrifftlichen den nachkommenden zu vberantworten. Dann woh auch solches nicht beschehen / wer wolt jezund wissen / was vor so vil jaren zu Troia beschehen vnd gehandelt worden ist: oder wolt diser zeit anzeigen kündten / was Thales / Democritus / Anaragoras / Xenophanes vnd andere Hochgelehrte berümpfte Physici/vnnd fleissige erkündiger natürlicher ding/gehalten oder geschriben hetten / von der eygenschafft vnnd Wunderbarlichen Würckung der Natur: des gleichen was Lehr vnnd Zuchtreglen Socrates/Plato/Aristoteles/Senon/Epicurus/vnd andre namhafte

Q ij hafftige